

Aen Seiqgyaiq Saekraiz Ciengxlwenx



永远的彩色世界

□ Danz Hijvah / 谭喜花



Boh Sung Naz hwnqmbonq hai dou, raen rog dou ndwn miz daegmbauq he, doeksaet caez. Huz Ging lienzmuengz naeuz: “Daxau, gou dwg daegyox Sung Naz, bonjlaiz banringzgvaq couh ndaej daengz, hoeng gou baez daih’ it daeuj, byaij loeng lo.” Boh Sung Naz yienznaeuz miz di mbouj maij de, hoeng seizneix hwnz lo, lijdwg hai dou hawj de haeuj ranz.

Ngoenz daihngaih, Huz Ging gaenx guh hongranz, caemhcai lij bek aek doiq bohmei Sung Naz mieng naeuz: “Boh’ au mehsimj, sou cuengqsim ba, seizneix yienznaeuz gungzhoj, hoeng gou haengj roengzrengz, cungj miz ngoenz he gou dingh hawj Sung Naz gvaq ndaej saedceij ndei!”

Doeklaeng Huz Ging youh laebdaeb daengz ranz Sung Naz bae song mbat, rox roen le hix mbouj byaij loeng gvaq lo. Bohmei Sung Naz roxnyinh daegmbauq neix dwg vunz ndei, rox doiq dahlwg ndei, couh

doengzeiq songde doxaeu lo. Bohmei Huz Ging rox miz dahsau nyienh haq hawj lwg gaeq, baenzlawz mbouj angq. Doxaeu le, ndawsim Huz Ging angqvauvau, bungz vunz youh gangj youh riu.

Doxaeu bi ndeu le, daeglwg Siujmungz okseng lo. Ngamq guh bohmei, songde roxnyinh vaiqvued vuenyungz dangqmaz. Sim’ angq gvaq le, songde youh yousim lo. Siujmungz okseng seiz ngamq miz 3 gaen lai, songde yawj mbouj raen, cungj dwg siujsim yubyub menhmenh lumh de, lau baez mbouj haeujsim couh sieng de. Miz mbat ndeu, Sung Naz swiq naj Siujmungz, ribfwngz miz di raez, mbouj haeujsim bungq fajnaj iquet oiqneb Siujmungz, miz diuz riz iq he. Siujmungz in ndaej sikhaek sing hung daej hwnjdaej, baenzlawz lox cungj mbouj daengx. Sung Naz dingq ndaej gig siengsim, doeklaeng baez gek song sam ngoenz couh raed ribfwngz.

Lij miz mbat ndeu, Sung Naz

okbae cawx byaek, Huz Ging youq ranz ciuqgoq Siujmungz. Sung Naz okdou mbouj geij nanz, Huz Ging fwt geiq ndaej geij ngoenz gonq baengzyoux de soengq hawj geu buhlwngyez cuengq youq aen daiz iq gyauejcong, de siengj dawz bae saeg, mbouj liuh daengz bungq doek cenj raemx gwnz daiz iq roengz gwnz cong. Siujmungz deng rwed dumz, youq gwnz cong seiqguengq luenh dik luenh cak daejnganga hwnjdaej.

Sung Naz okdou gip lai lumz dawz cienz, de baenqndang maranz aeu cienz raen lwg daej, doq cam. Huz Ging najmong gangj de bungq cenj raemx doek, rwed deng lwg. Sung Naz doq hawj Siujmungz vuenh buhvaq doq ndaq Huz Ging: “Mwngz boux vunz neix guh saeh hawj gou di he hix mbouj ndaej cuengqsim, gou ngamq okdou mbouj geij nanz lwg couh deng rwed. Caeklaiq mbouj deng raemxgoenj rwed, danghnaeuz lwg deng sieng gou mbouj nyiuz mwngz!” Sung

Naz ndaq ndaej Huz Ging mbouj gamj han, lumj moegyau nei dinghdingh naengh youq gizhaenx.

Sung Naz ndaq gaeuq le, sawqmwh sing hung daej hwnjdaej: “Gaej gangj mwngz, baezgonq gou hix mbouj haeujsim. Raeuz song gvanbaz cungj dafangz, ndwenngoengz gaenq gvaq ndaej gig gunnanz lo, mboujlwnh baenzlawz, raeuz itdingh aeu ganqhoh ndei Siujmungz, doeklaeng de couhdwg lwgda raeuz, dwg maqmuengh raeuz ha!” Dingq mehyah baenzneix gangj, gvaengzda Huz Ging dumz lo, de roxnyinh swheij doiq mbouj hwnj Sung Naz caeuq Siujmungz, caen maqmuengh gij lwgda swheij yawj ndaej raen, couh mbouj rox miz gij saeh neix fatseng lo.

Huz Ging laeglemx roengz giet-sim, itdingh aeu roengzrengz bae guh aen saehnieb okdaeuj, hawj song mehlwg gvaq ndaej soeng di, hawj Sung Naz mbouj aeu bae yousim gwndaenj. (caengz sat)

Duzmoed Iq Moengjdoengj

懵懂的小蚂蚁

□ Mungz Ningz / 蒙宁

Mbwn ngamq rongh, ndaw rog rongz duzmoed couh hainduj muengz hwnjdaej lo: Gyoengq moed miz di dawz gij nyapnyaj ndaw rongz buen coh rog, miz di cingq baet diuz loh baihnaj bakcong. Cij miz duz moed iq guh ndaej mbouj haeujsim. De doq menhyedyed gwed nyapnyaj, doq niemh gij feih gijwn ngoenzlwenz.

Yenzlaiz ngoenzlwenz banringz, duzmoed aemq duznayenh daengz ndaw reihfaiq, duznayenh cingj duzmoed gwn gij raemxraiz diemzsis. Duz moed iq neix baez gwn couh daengx mbouj roengzdaej.

Baez siengj daengz raemxraiz, gij sim de gaenq mbin daengz ndaw reihfaiq bae lo. Yaep he, de saedcaih nyaenx mbouj ndaej lo, swnh daihgaya muengz guh hong, byawz hix mbouj ndaejhoengq dam de, couh cienqndang deuz ok, laeglemx coh reihfaiq raih bae.

“Daengx roengzdaej, mwngz bae gizlawz?” Duzmoed iq ngamq lizhai bakcong, baihlaeng couh miz duzmoed hemq de.

Duzmoed iq baenq gyauej baez yawj, duz moed souj dou gyaep gvaqdaej, de cij dingz yamq.

“Mwngz vihmaz mbouj souj gijliz? Seizneix cingq baet ranz. 8 diemjcong cij ndaej okrog bae ra


gijgwn.” Duzmoed souj dou laengz gij roen de.

“Vihmaz aeu daengz 8 diemjcong cij ndaej okrog?” Duz moed iq cam.

“Neix dwg gvidingh.” Duzmoed souj dou yiemz naeuz, “Ngoenzneix dwg ngoenzrengx, raeuz aeu 6 daengz 7 diemjcong hwnqcong, 8 daengz 9 diemjcong okbae ra gwn. Gyoengqvunz gaengqawq gij hozdung raeuz yawj dienheiq. Danghnaeuz mwngz bouxdog luenhdaej, gyoengqvunz couh loek nyinhnaeuz gij dienheiq yaek bienq, neix couh vaih saeh lo. Duz moed iq, gyoengq duzmoed raeuz dwg boux yawhbauq dienheiq, mwngz aeu gyaep aen mingzdaez neix ha!”

Duzmoed iq cijndei dauqbae, laebdaeb guh hong, hoeng de mbouj angq saekdi. Seizgan okbae daengz lo, gyoengq duzmoed faenfaen okrog bae ra gijgwn. De gipmuengz coh reihfaiq raih bae. De daej daengz reihfaiq baez yawj, doeksaet yat, mbouj rox daj gizlawz daej baenzlai dahcejraiz — nengzgoemj.

Gyoengqde gaemh duznayenh duz dem duz, yaep he, couh gwn bae dingzlai. Duzmoed iq ngeix: Danghnaeuz deq gyoengq nengzgoemj neix gwn duznayenh sat, gou bae gizlawz gwn raemxraiz diemz ne? De doq



Gomiuz ndaw naz maj ndaej mwnfagfag.

Dozswh

sing hung hemq naeuz: “Dahcejraiz, gyoengqsou dwg bouxcaeg, sou vihmaz aeu gaj dai duznayenh iquetet neix?”

Duz nengzgoemj ndeu hozung naeuz: “Duzmoed iq beixnuengx, mwngz loek lo. Bouxcaeg mbouj dwg dou, dwg duznayenh. Mwngz yawj gij ganjfaiq deng duznayenh gwn neix. Bouxguhnaz daegdaengq cingj dou daej sousib gyoengq duznayenh bouxcaeg iq neix. Mwngz vihmaz vunzdig vunzgaeg mbouj faen, fanjdauq ndaq dou ne?”

Duzmoed iq ngiengxyaeuj baez yawj, gij ganjfaiq deng duznayenh gwn

baenz go baenz go rozbyom caez. Hoeng, ndawsim de lij siengj gwn gij raemxraiz diemz, siengsim naeuz: “Gou caiq hix mbouj ndaej gwn raemxraiz diemz lo.”

Duz nengzgoemj neix ngauzgyaeuj naeuz: “Caen moengjdoengj, mwngz cij guenj swheij gwnndoet, cix mbouj goq gofaiq dailix! Ngoenzneix mwngz ganq duznayenh, ngoenzlaeng bouxguhnaz beg guh hong daengx bi!”

Fajnaj duzmoed iq mbouj rox seizlawz hoengzgywggywg, mbouj rox han dauq coenz lawz.